



**Sumáriu Kazu
Tribunál Distritál Oekusi
Novembru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 15

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	2
Artigu 154 (KP), konjuga ho artigu 2, 3, no 35(b) no 36 (LKVD)	Maus-tratus ba kónjuje ho natureza violénsia doméstika no tipu ilísitu sira kona-ba violénsia doméstika.	2
Artigu 145 (KP), konjuga ho artigu 2, 3, no 35(b) no 36 (LKVD), no artigu 20 kona-ba arma branca husi lei nú. 5/2017	Krime arma branca ho ofensa ba integridade física simples ho natureza violénsia doméstika.	1
Artigu 139 KP, konjuga ho artigu 2, 3, no 35(b) no 36 (LKVD)	Omisídiu agravadu ho natureza violénsia doméstika.	1
Artigu 138 KP, 23 KP, 24 KP konjuga ho artigu 2, 3, no 35(b, c) no 36 (LKVD)	Tentativa omisídiu simples ho natureza violénsia doméstika.	1
Artigu 259 KP	Danu agravadu	2
Artigu 316 KP	Kontrabandu	4
Artigu 145 (KP)	Ofensa ba integridade física simples	2
Totál		15

2. Totál desizaun ne'ebé JSMP monitoriza : 13

Tipu desizaun	Artigu	Númeru
---------------	--------	--------

Prizaun	Artigu 66 KP	2
Suspensaun ba prizaun nia ezekusaun	Artigu 68 KP	8
Omologa pedidu dezisténsia keixa	-	1
Absolve	-	2
Totál		13

3. Total kazu sira ne'ebé kontinua prosesu tuir JSMP nia monitorizasaun : 2
B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika no arma brankas

Nú. Prosesu : 0019/19.OESIC
Kompozisaun Tribunál : Kolektivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Jhon Ndun
Desizaun : Pena prizaun tinan 2 fulan 6 suspende ba tinan 3 no bsolve
krime arma branca

Iha 07 Novembru 2022, Tribunál Distritál Oekusi prezide julgamentu leitura akordaun ba krime ofensa ba integridade fízika simples ho natureza violénsia deméstika no arma brankas ne'ebé envolve arguidu SAS hasoru nia eis feen, iha Distritu Oekusi.

Akuzasaun Prokuradór

Prokuradór akuza katak iha 22 Setembru 2019, maizumenus iha oras tuku 14:00 lokraik, arguidu nia oan feto na'in rua ne'ebé hela ho lezada hakarak hasoru malu ho arguidu ne'ebé nu'udar sira nia aman. Nune'e lezada ho nia oan feto na'in rua akompañã husi lezada nia inan/aman ba iha arguidu nia hela fatin, tanba durante fulan neen ona labarik sira lahasoru malu ho arguidu. Bainhira too iha arguidu nia hela fatin, odamatan no janela sira taka hotu lezada ba iha uma kotuk hodi dere odamatan maibé arguidu lakohi sai mai no nonok de'it iha kuartu laran. Lakleur arguidu lori katana taa estraga vidru jenela nian hafoin lori katana sai mai liur hodi halo tauk lezada ho nia oan sira no basa dala rua iha lezada nia hasan parte karuk, kaer lezada nia liman rua hodi dulas maka'as kaer no rakut lezada nia fuuk. Aktu ne'e rezulta lezada sofre moras. Kazu ne'e aneksu hamutuk ho relatóriu médiku husi PRADET no fotografia kona-ba aktu violénsia ne'e hasai husi polisia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no artigu 20 kona-ba arma brankas.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun arguidu deklara katak taa estraga vidru jenela nian no kaer katana sai ba iha liur tanba lezada

sira mai barak hafoin tama fali ba uma laran rai fali katana no sai hasoru lezada ho família sira hodi koalía. Arguidu mós deklara katak basa dala ida iha lezada nia hasan parte karuk laos dala rua, lakaer lezada nia liman rua hodi dulas maka'as, lakaer lezada nia fuuk rakut ba kotuk, antes ne'e mai ona iha tribunál ba krime hasoru nia feen dala rua no hetan ona kastigu ho pena multa, arguidu hola ona feen kiik iha ona oan na'in rua, lezada ba ho família no balun hakilar hodi halo arguidu mós tauk, arguidu hela hamutuk ho sira nia oan na'in ida no lezada hela ho sira nia oan na'in rua, diak malu ona ho nia feen boot no promete sei larepete hikas hahalok ne'e iha futuru, serbisu hanesan empreatariu ho rendimentu kada fulan tolu US1,000.00 no arguidu nia oan hamutuk na'in lima ona.

Entretantu lezada konfirma faktu hotu iha akuzasaun no deklara katak problema ne'e akontese tanba arguidu sempre deskomfia lezada amante (*selingkuh*) ho mane seluk maibé too ikus arguidu mak hola fali feto seluk rezulta lezada ho arguidu tenke husik malu hanesan feen ho laen. Lezada deklara liután katak antes ne'e arguidu baku ona lezada no mai ona iha tribunál maibé arguidu nafatin kontinua repete nia hahalok hasoru lezada tanba atu hola tan feen kiik. Lezada kontinua haktuir katak depoisde akontesementu la to'o tinan arguidu hola fali feto seluk, agora sira diak malu ona no momentu lezada sira ba iha arguidu nia uma ho objetivu sira nia oan na'in rua atu hasoru arguidu inklui atu koalía kona-ba labarik sira se mak atu haree ka responsabiliza ba sira nia nesesidade lor-loron nian no iha akontesementu ne'e arguidu taa estraga deit vidru janela nian no la lari katan ameasa lezada.

Testemuña BE nu'udar arguidu nia família depoimenta katak iha akontesementu ne'e testemuña la haree ho matan tanba sei haree hela nia kareta ema hadia depoisde fila mak testemuña haree arguidu ho lezada diskute malu hela, nune'e testemuña tama ba hodi hakalma sira na'in rua. Testamuña depoimenta liután katak kona-ba arguidu basa no kaer katana ne'e, testemuña la haree ho matan no lahatene.

Alegasaun finál

Prokuradór konsidera arguidu provadu komete krime hasoru lezada, mezmú arguidu konfesa parsialmente maibé lezada konfirma no iha akontesementu ne'e arguidu kaer katana ho objetivu atu hatauk de'it lezada ho nia família sira mezmú arguidu rasik hatene kuandu iha problema ruma tuir lei proibidu atu kaer katana maibé arguidu nafatin kaer katana hodi rezolve problema. Prokuradór haktuir katak arguidu deskomfia lezada amante ho mane seluk no baku bebeik lezada ho objetivu atu arguidu bele hola tan feen kiik laos lezada mak amante. Ho nune'e husu ba tribunál atu kondena arguidu tuir artigu 145 KP.

Enkuantu defeza konsidera aktu krime sira ne'e akontese tanba mosu provokasaun husi lezada ne'ebé ba vizita arguidu ho ema barak no hakilar mós arguidu hodi halo arguidu mós tauk kaer katana hodi lao sai ba estrada. Defeza haktuir tan katak tuir loloos kuandu atu ba rezolve problema kona-ba arguidu ho lezada fahe malu laos ba ho família no hakilar maibé persija hato'o keixa ba autoridade hodi tenta rezolve problema ne'e tuir ninia dalan no defeza konsidera aktu ne'e mosu tanba lezada lasatisfas ho arguidu ne'ebé deside husik lezada hodi hola fali feto seluk. Defeza deklara liután katak mezmú arguidu ho lezada antes ne'e iha problema maibé sira rasik deklara katak sira dame malu

ona, arguidu sempre tau matan ba sira nia nesesidade lor-loron nian, promete sei larepete ona hahalok ne'e iha futuru no arguidu iha oan hamutuk na'in lima tanba feen boot iha oan tolu no feen kiik iha ona oan na'in rua. Tanba ne'e, defeza husu ba tribunál atu tetu hotu deklarasaun husi arguidu ho lezada no aplika pena ne'ebé mais adekuadu tuir arguidu nia sala.

Desizaun

Depoisde avalia ba faktu hotu tribunál prova katak basa dala rua iha lezada nia hasan parte karuk, kaer lezada nia liman rua hodi dulas maka'as kaer no rakut lezada nia fuuk. Enkuantu ba krime arma brankas tribunál konsidera la provadu tanba lezada rasik iha produsaun ba prova deklarata katak momentu ne'e arguidu lori duni katana taa estraga tiha vidru janela nian no sai ba liur apenas atu halo tauk de'it lezada ho nia família sira.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu kolabora, diak malu ona ho lezada no promete sei la repete tan krime hanesan iha futuru, ho nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan tolu.

2. Krime omisídiu agravadu ho natureza violénsia doméstika

Nú. Prosesu : 0013/21.OESIC
Kompozisaun Tribunál : Kolektivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 17

Iha 08 Novembru 2022, Tribunál Distritál Oekusi prezide julgamentu leitura akordaun ba krime omisídiu agravadu ho natureza violénsia doméstika ne'ebé envolve arguidu CS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Feveireiru 2021, maizumenus iha oras tuku 12:30 dadeer, arguidu foin fila husi toos no husu lezada atu prepara hahan maibé lezada responsde katak ba badiu iha fatin-fatin fila mai husu hahan, ho nune'e arguidu tuku dala barak iha lezada nia hirus matan, knosen karuk no kotuk laran rezulta lezada lakon nia vida (mate). Kazu ne'e aneksu hamutuk ho relatóriu médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 139 KP kona-ba omisídiu agravadu ho moldura penál tinan 12 to'o tinan 25 konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no arrepende ona nia hahalok no konsidera nia hahalok ne'e ladi'ak. Arguidu deklarata mós katak antes ne'e nunka tuku

ka baku lezada, depoisde arguidu haree lezada mate ona no arguidu kous lezada ba tau iha kama leten arguidu sente triste. Arguidu ho lezada iha oan na'in haat no agora dadaun hela ho nia avo sira, arguidu serbisu hanesan toos na'in laiha rendimentu fiksi kada fulan, foin primeiravés mai hatan iha tribunál.

Testemuña MSS nu'udar lezada ho arguidu nia oan depoimenta katak bainhira testemuña fila husi eskola haree lezada toba iha kama leten testemuña fanu lezada maibé lezada lahader no momentu ne'e polísia seidak too iha fatin akontesementu. Testemuña mós deklara katak agora dadauk hela ho nia avo sira haree testemuña diak no testemuña sira nia uma depoisde akontesementu husik mamuk de'it too agora no testemuña hare arguidu lagosta tanba arguidu baku mate tiha testamuña ninia inan.

Prokuradór husu ba tribunál atu presinde testemuña sira seluk nia depoimentu tanba arguidu konfesa no defeza konkorda ho pedidu ne'e. Tanba ne'e, tribunál bazeia ba pedidu ne'e presindi testemuña sira seluk, tanba arguidu konfesa faktu hotu iha akuzasaun.

Alegasaun finál

Prokuradór intende katak hahalok arguidu nian provadu no priense duni elementu krime omisídiu agravadu ho natureza violénsia deméstika hasoru nia feen. Prokuradór konsidera arguidu nia hahalok ne'e kruel teb-tebes hasoru lezada tanba de'it motivu ne'ebé bele rezolve de'it ho liafuan maibé arguidu ho hirus tuku dala-barak iha hirus matan, knosen karuk no kotuk too lezada mate fatin mak foin arguidu sente diak. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu aplika pena prizaun tinan 20 ba arguidu.

Entretantu defeza haktuir katak depoisde akontesementu arguidu la halai husi fatin akontesementu maibé arguidu nafatin telefone ba polísia ate polísia too iha fatin akontesementu halo atusaun ba arguidu. Defeza hanoin katak arguidu kolabora diak ho tribunál tanba deklarasaun ne'ebé hatoo ona iha primeiru interrogatoriu antes too agora nafatin mantein ninia deklarasaun, arrepende ona nia hahalok, arguidu mak iha responsabilidade maximu ba nia oan na'in haat balun sei kiik oan hela ho sira nia avo. Tanba ne'e, defeza husu ba tribunál kolektivu atu aplika pena ne'ebé menus husi tinan 20 ho konsiderasaun katak arguidu nia oan na'in haat no balun sei kiik oan hela ho nia avo mak tau matan ba sira nia nesesidade moris lor-loron nian

Desizaun

Depoisde avalia ba faktu hotu tribunál prova katak arguidu tuku dala barak iha lezada nia hirus matan, knosen karuk no kotuk laran rezulta lezada lakon nia vida (mate).

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu konfesa, arrepende ona nia hahalok, nune'e tribunál konklui prosesu ne'e no kondena arguidu ho pena prizaun tinan sanulu resin hitu.

3. Krime kontrabandu

Nú. Prosesu : 0022/20.PDOEC

Kompozisaun Tribunál : Kolektivu
Juis : Dr. Yudi Pamukas
: Dr. Hugo da Cruz Pui
: Dr Evangelino Belo.
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 2 suspende ba tinan 2

Iha 08 Novembru 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Maria Colo hasoru Estadu RDTL, iha Aldeia Oenoa, Suku Bobometo Sub-distritu Oesil, Distritu Oekusi.

Akuzasaun Prokuradór

Prokuradór akuza katak iha loron ne'ebé la apura maibé iha Novembru 2019, no oras ne'ebé la apura, arguida ba iha Fronteira Saben hodi halo transaksaun ba audubus 50% saku rua hodi lori tama mai territoriu Timor-Leste liuhusi dalan illegal hodi laselu taxa ba Estadu RDTL no liuhusi Alfandega.

Prokuradór akuza arguida kontra artigu 316 nú. 1 KP kona-ba krime kontrabandu ho moldura penál tinan 2 to'o tinan 6.

Produsaun ba prova sira

Iha julgamentu, arguida konfesa faktu hotu iha akuzasaun, arrepende ona nia hahalok no promete sei la kometan krime hanesan iha futuru no foin primeiravés hatama sasan tuir dalan illegal, serbisu hanesan toos na'in laiha rendimentu fiksi kada fulan, arguida iha oan na'in rua no arguida mak buka hahan hodi sustenta nesiedade família nian.

Prokuradór husu ba tribunál atu presinde testemuña nia depoimentu tanba arguida konfesa no defeza konkorda ho pedidu ne'e. Tanba ne'e, tribunál bazeia ba pedidu ne'e presinde testemuña husi Unidade Patrolhamentu Fronteira (UPF) tanba iha produsaun ba prova arguida rasik konfesa faktu hotu.

Alegasaun finál

Prokuradór konsidera arguida provadu komete krime kontra bandu bazeia ba konfisaun arguidu nian. Prokuradór reforsa liután katak krime sira kontrabandu rejista-aas iha prosesu kolektivu hotu iha juridiksaun Oekusi. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu kondena arguida ho pena prizaun tinan 2 suspende ba tinan 2.

Entretantu defeza husu ba tribunál atu kondena arguidu ho pena ne'ebé adekua ho konsiderasaun katak, arguida konfesa, arrepende ona nia hahalok, foin primeiravés hatama sasan liuhusi dalan illegal, promete sei la komete tan krime hanesan iha futuru no arguida iha oan na'in rua no arguida mak buka hahan hodi sustenta nesiedade família nian.

Desizaun

Depoisde avalia faktu hotu tribunál konsidera faktu hotu provadu, bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok, foin primeiravés hatama sasan liuhusi dalan illegal no promete sei la repete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

4. Krime kontrabandu

Nú. Prosesu : 0188/17.OESIC
Kompozisaun Tribunál : Kolektivu
Juis : Dr. Yudi Pamukas
: Dr. Hugo da Cruz Pui
: Dr. Evangelino Belo.
Prokuradór : Dr. Pedro Baptista Aleixo dos Santos
Defeza : Dr. Afonso Gomes Fatima
Desizaun : Pena prizaun tinan 2 suspende ba tinan 2

Iha 08 Novembru 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Henricos Caet hasoru Estadu RDTL, iha Aldeia Saben, Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 01 Setembru 2017, maizumenus iha tuku 23:00 kalan, arguidu hatama gazoel litru 80 husi Kefa-Indonezia mai territoriu Timor-Leste la-selu taxa ba Estadu RDTL liuhusi diresaun Alfandega iha fronteira.

Prokuradór akuza arguidu kontra artigu 316 nú. 1 KP kona-ba krime kontrabandu ho moldura penál tinan 2 to'o tinan 6.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun katak loos duni arguidu hola mina gazoel ne'e husi sidadaun Indonezia ida iha fronteira entre Timor-Leste ho Indonezia. Arguidu dehan katak arguidu hola mina gazoel ne'e iha área Timor Leste nian laos iha área Indonezia nian mak lori tama mai, arrepende ona nia hahalok, foin primeiravés hatama sasan hanesan mina husi dalan illegal, promete sei larepete hahalok hanesan iha futuru, serbisu hanesan negosiante kiik ho rendimentu kada fulan US\$100.00, arguidu iha oan na'in rua no arguidu mak buka hahan hodi sustenta nesiedade família nian.

Prokuradór husu ba tribunál atu presinde testemuña nia depoimentu tanba arguidu konfesa no husi defeza laiha opozisaun. Tanba ne'e, tribunál bazeia ba pedidu ne'e no presinde testemuña husi UPF tanba iha produsaun ba prova arguidu rasik konfesa faktu hotu.

Alegasaun finál

Prokuradór intende katak hahalok arguidu nian ne'e provadu tuir lei no konsidera preense duni elementu krime kontrabandu tuir artigu 316 nú. 1 husi Kódigu Penál. Prokuradór

reforsa tan katak krime sira kontrabandu mak rejista-aas iha prosesu kolektivu hotu iha juridiksaun Oekusi. Tanba ne'e, prokurador laiha duvida ba faktu sira hotu iha akuzasaun no husu ba tribunál atu kondena arguidu ho pena prizaun tinan 2 suspende ba tinan 2.

Enkuantu defeza konsidera hahalok arguidu nian la prenze elementu krime kontrabandu tanba tuir deklarasaun arguidu katak iha momentu ne'e hola mina gazoel ne'e husi sidadaun ida ne'ebé hatama mina liu husi territoriu Timor-Leste nian hafoin arguidu hola. Defeza dehan katak durante iha produsaun ba prova arguidu konfesa, kolabora diak, arrepende ona nia hahalok, arguidu foin primeiravés hatama sasan hanesan mina husi dalan illegal, promete sei larepete tan hahalok hanesan iha futuro, serbisu hanesan negosiante kiik ho rendimentu kada fulan US\$100.00, arguidu iha oan na'in rua no arguidu mak buka hahan hodi sustenta nesesidade família nian. Tanba ne'e, defeza tetu hodi husu ba tribunál kolektivu atu absolve arguidu husi aktu krime ne'e maibé karik tribunál iha hanoin seluk, parte defeza husu justisa.

Desizaun

Depoisde avalia ba faktu hotu tribunál prova katak arguidu hatama gazoel litru 80 husi Kefa-Indonezia mai territoriu Timor-Leste la-selu taxa ba Estadu.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu konfesa, arrepende ona nia hahalok no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

5. Krime danu agravadu

Nú. Prosesu	: 0219/14.PDOEC
Kompozisaun Tribunál	: Kolektivu
Juis	: Dr. Hugo da Cruz Pui : Dr. Evangelino Belo : Dr. Yudi Pamukas
Prokurador	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Absolve

Iha 10 Outubru 2022, Tribunál Distritál Oekusi prezide julgamentu leitura akordaun ba krime danu agravadu ne'ebé envolve arguidu Julio de Alberto Colo hasoru Estadu RDTL, iha Aldeia Buqui, Suku Usitasae, Sub-distritu Oesilo, Distritu Oekusi.

Akuzasaun Prokurador

Prokurador akuza katak iha 06 Juñu 2014, maizumenus iha oras tuku 11:00 dadeer, arguidu lori ai-suak ke'e estraga irigasaun bee dalan ba natar ne'ebé halo husi Estadu RDTL. Iha akontesementu ne'e, testemuña Isto Sanauno Abi, Anastacio Oqui, Thomas Pereira, Mateus Sanauno hanesan badaen fatuk, ke'e no halo irigasaun be'e dalan ne'e besik ho arguidu nia lutu toos nian maibé lahusu ka lakonsulta ho arguidu molok sira ke'e baleta refere, tanba ne'e arguidu la aseita hodi estraga tiha baleta ne'ebé halo hotu ona.

Prokuradór akuza arguidu kontra artigu 259 KP kona-ba danu agravadu ho moldura penál tinan 2 to'o tinan 8.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak problema ne'e akontese tanba testemuña sira la fó hatene arguidu kona-ba irigasaun ne'e tanba liuhusi arguidu nia lutu oin, depoisde estraga hotu tiha sente hahalok ne'e ladiak no arrepende ona nia hahalok, diak malu ona ho testemuña sira, foin primeiravés mai hatan iha tribunál, promete sei larepete tan iha futuru, serbisu hanesan toos na'in laiha rendimentu fiksi kada fulan, oan na'in lima arguidu mak iha responsabilidade maximu ba iha nia família.

Prokuradór husu ba tribunál atu presinde testemuña sira nia depoimentu tanba arguidu konfesa no husi defeza laiha opozisaun. Tanba ne'e, tribunál bazeia ba pedidu husi prokuradór no presinde testemuña sira nia depoimentu tanba iha produsaun ba prova arguidu rasik konfesa faktu integralmente.

Alegasaun finál

Prokuradór konsidera hahalok arguidu nian provadu no preense duni elementu krime danu agravadu no tuir loloos ba husu didiak maibé arguidu haree irigasaun sei bokon hela no direktamente estraga tiha baleta ne'ebé testemuña sira halo hodi osan estadu nian ba comunidade. Tanba ne'e, prokuradór husu ba tribunál atu kondena arguidu ho pena prizaun tinan 2 suspende ba tinan 2.

Enkuantu defeza konsidera aktu krime ne'e akontese tanba laiha kuñesementu ba arguidu enrelasaun ho irigasaun bee dalan ne'ebé liuhusi arguidu nia lutu oin hodi arguidu hatene, nune'e arguidu hirus hodi estraga baleta refere maibé laos lori ai-suak maibé arguidu estraga ne'e lori de'it nia ain no baleta-estragus ne'e arguidu hadia hikas ona. Tanba ne'e, defeza solísita ba tribunál atu aplika pena ne'ebé adekua ba arguidu ho konsiderasaun katak arguidu konfesa, arrepende ona nia hahalok, diak malu ona ho testemuña sira, foin primeiravés mai hatan iha tribunál no promete sei larepete hahalok hanesan iha futuru, serbisu hanesan toos na'in laiha rendimentu fiksi kada fulan, oan na'in lima arguidu mak iha responsabilidade maximu ba iha nia família.

Desizaun

Depoisde avalia faktu hotu tribunál konsidera hahalok arguidu nian la preense elementu husi krime danu agravadu tanba iha momentu ne'e baleta sei bokon hela mak arguidu lori ain estraga lori ain laos lori ai-suak, depoisde akontesementu arguidu arrepende ona nia hahalok hodi kontinua hadia hikas buat ne'ebé mak arguidu estraga ona, dame malu ona ho testemuña sira, problema ne'e akontese tanba testemuña sira la fó hatene arguidu kona-ba irigasaun ne'e tanba liuhusi arguidu nia lutu oin, foin primeiravés mai hatan iha tribunál no promete sei larepete hahalok hanesan iha futuru, serbisu hanesan toos na'in laiha rendimentu fiksi kada fulan, iha oan na'in lima arguidu mak iha responsabilidade maximu ba iha nia família.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok no promete sei la komete tan krime hanesan iha futuru. Nune'e tribunál konklui prosesu ne'e no absolve arguidu husi krime ne'e.

6. Krime danu agravadu

Nú. Prosesu : 0120/19.OESIC
Kompozisaun Tribunál : Kolektivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Absolve

Iha 11 Novembru 2022, Tribunál Distritál Oekusi prezide leitura akordaun ba krime danu agravadu ne'ebé envolve arguidu Daniel Nesi ho Adão Anuno Nono hasoru lezadu Moeses Fernandes, iha Aldeia Baqui, Suku Naimeco, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 05 Agostu 2019, maizumenus iha oras tuku 18:45 lokraik, arguidu sira estraga lezadu nia odamatan kareta nian parte loos kauza kabetak, wepper odamatan parte loos kauza tohar, besi eskada parte loos rezulta tohar, body kareta parte loos rezulta tinta nakloke no kareta refere babain kada loron bele hetan osan US\$500.00. Depoisde akontesementu kareta refere para deit iha edifisiu prokuradór durante fulan lima, nune'e lezadu husu atu selu indemnizasaun sivil ho valor osan US\$75.000.00. Kazu ne'e aneksu hamutuk ho fotografia kona-ba aktu violénsia ne'ebé hasai husi polisia.

Prokuradór akuza arguidu sira kontra artigu 259 KP kona-ba krime danu agravadu ho moldura penál tinan 2 too tinan 8.

Produsaun ba prova sira

Arguidu Adão Nuno Nono deklara katak arguidu sira la estraga lezadu nia kareta tuir faktu ne'ebé hakerek iha akuzasaun, maibé arguidu deklara katak momentu ne'e lezadu mak lori nia kareta soke arguidu nia kios hodi rezulta kareta aat, antes ne'e arguidu deve lezadu nia osan US\$60.00 no lezadu nia feen sempre sisi bebeik ninia osan, depoisde akontesementu arguidu fó ona lezadu nia osan US\$60.00, arguidu iha oan na'in neen, serbisu hanesan negociante ho rendimentu kada fulan US\$230.00 no arguidu foin primeiravés mai hatan iha tribunál.

Iha julgamentu arguidu Daniel deklara katak faktu iha akuzasaun ne'e laloos tanba momentu ne'e kuandu arguidu ba iha fatin akontesementu laharee kareta para iha ne'eba maibé haree arguidu Adao nia uma hanesan kareta soke estraga tiha ona. Arguidu dehan katak momentu kareta soke kios ne'e arguidu rasik laharee, arguidu sei

klosan no agora dadauk tuir hela kursu lian korea ho ingles, foin primeiravés mai hatan iha tribunál.

Alende ne'e, lezadu Moeses Fernandes deklara katak momentu estraga kareta ne'e, lezadu la haree ema ruma maibé apenas diskonfia de'it. Lezadu deklara katak sasan ne'ebé arguidu sira estraga ne'e lato'o US\$500.00 no maizumenus to'o US\$300.00. Lezadu mós deklara katak dame malu ona ho arguidu na'in rua. Lezadu ho vontade rasik hakarak taka prosesu ne'e de'it hasoru arguidu na'in rua tanba momentu ne'e lezadu apenas diskonfia de'it maibé laharee ho matan.

Testemuña Aguida Pinto Pereira laiha relasaun família ho arguidu na'in rua depoimenta katak testemuña haree arguidu na'in rua mak lori fatuk tuda duni kareta, arguidu na'in rua kaer fatuk hotu, iha momentu ne'e testemuña nia oan tinan haat iha hela kios laran nune'e testemuña halai tama fali ba kios laran. Depoizde testemuña ho nia laen arguidu hadia fali kareta ne'e iha Dili ho valor US\$1, 500.00 no kareta ne'e hola iha tinan 2011.

Alegasaun final

Prokuradór intende katak hahalok arguidu sira provadu no preense duni elementu krime ba danu simples laos danu agravadu tanba iha produsaun ba prova lezadu rasik deklara katak sasan estraga ne'e maizumenus ho valor osan \$300.00 laos \$500.00. Tanba ne'e, prokuradór husu ba tribunál atu kondena arguidu sira kona-ba krime danu simples atu iha futuru labele kontinua repete hikas hahalok ne'e no ema seluk labele halo tuir.

Enkuantu defeza husu ba tribunál atu absolve arguidu sira husi prosesu ne'e ho konsiderasaun katak deklarasaun lezadu dehan katak sasan ne'ebé estraga maizumenus \$300.00 laos \$500.00. Enkuantu Testemuña hanesan lezadu nia feen depoimenta katak sasan ne'ebé estraga ne'e too US\$1, 500.00 no husi deklarasaun hirak ne'e hotu hamosu duvida atu komprova hahalok arguidu sira nian ne'e preense elementu krime danu simples ka agravadu. Tanba ne'e, defeza solísita ba tribunál atu absolve arguidu sira husi prosesu ne'e ho konsiderasaun katak iha produsaun ba prova deklarasaun lezadu ho nia feen hanesan testemuña iha duvida, dame malu ona ho arguidu sira no lezadu rasik ho vontade hakarak prosesu ne'e labele kontinua no taka de'it iha tribunál.

Desizaun

Depoizde avalia ba faktu hotu ne'ebé produs durante iha produsaun ba prova tribunál konsidera arguidu na'in rua la provadu komete krime danu agravadu, tanba lezadu deklara katak iha akontesementu ne'e laharee ema estraga kareta pelu kontrariu ho testemuña ninia depoimentu ne'ebé dehan katak haree duni arguidu na'in rua mak estraga kareta refere, tanba ne'e hamosu duvida ba tribunál.

Bazeia ba faktu la provadu hirak ne'e tribunál konklui prosesu ne'e no absolve arguidu na'in rua husi aktu krime ne'e ho konsiderasaun katak lezadu nia deklarasaun ho testemuña ne'ebé nu'udar lezadu nia feen la hanesan nune'e hamosu duvida iha prosesu ne'e rasik.

7. Krime tentativa omisídiu simples ho natureza violénsia deméstika

Nú. Prosesu : 0024/21.OEPSB
Kompozisaun Tribunál : Kolektivu
Juis : Dr. Yudi Pamukas
: Dr. Hugo da Cruz Pui
: Dr. Evangelino Belo
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 10

Iha 14 Novembru 2022, Tribunál Distritál Oekusi prezide leitura sentensa ba krime tentativa omisídiu simples ho natureza violénsia deméstika ne'ebé envolve arguidu CP hasoru nia feen DE ho sira nia oan PS, iha Distritu Oekusi.

Akuzasaun Prokuradór

Prokuradór akuza katak iha 23 Agostu 2021, maizumenus iha oras tuku 17:00 lokraik, arguidu ho lezada DE diskute malu kona-ba lezada hakarak ho sira nia oan atu ba vizita lezada nia inan/aman, nune'e arguidu taa dala rua iha lezada DE nia kanuruk, taa dala ida iha lezada DE nia liman fuan parte loos rezulta kotu, taa dala rua iha lezada DE nia liman sikun parte loos suku pontu sanolu resin ualu. Iha momentu ne'esira nia oan PS ne'ebé foin mak fulan sanolu resin ida hetan taa husi arguidu, tanba iha akontesementu ne'e lezada kous hela. Konsekuensia husi arguidu nia hahalok ne'e rezulta lezada ho lezadu hetan kanek, liman fuan ida kotu, mean, bubu, raan sai no sofre moras. Kazu ne'e aneksu hamutuk ho relatóriu médiku no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 138 KP kona-ba krime omisídiu simples ho moldura penál tinan 2 to'o tinan 8, artigu 23 KP kona-ba tentativa ho artigu 24 KP kona-ba tentativa nia punibilidade konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arguidu taa nia feen iha kanuruk kauza kanek. Antes ne'e arguidu nia feen fó hatene ba nia maun dehan katak arguidu diskonfia lezada amante (*selingkuh*) ho mane seluk, nune'e lezada nia maun tuku dala ida iha lezadu nia inus no matan karuk rezulta arguidu sofre moras. Arguidu deklara katak lezada nia maun mak taa arguidu nia oan mane. Arguidu deklara mós katak bainhira taa nia feen no lezada kous hela sira nia oan. Arguidu iha oan na'in rua, foin primeiravés mai hatan iha tribunál no serbisu hanesan toos na'in laiha rendimentu fiksi kada fulan.

Alende ne'e lezada kontinua konfirma faktu hotu iha akuzasaun no deklara katak bainhira lezada ho sira nia oan atu ba lezada nia inan/aman mak arguidu halai tuir hadau tiha pasta soe no taa kedas lezada. Hola malu ho arguidu maizumenus tinan ualu ona no arguidu sempre diskonfia lezada amante ho mane seluk. Lezada deklara mós katak sira nia oan ne'e mós arguidu mak taa hotu, tanba bainhira arguidu taa lezada, lezada kous hela ho sira nia oan, nune'e kona-ba mós sira nia ona, lezada deklara liután katak arguidu

taa dala lima no lezada nia liman fuan ida lakon tiha tanba momentu ne'e atu satan netik ninia ulun no katana kona iha lezada nia liman kotu kedas. Laos sira nia oan tanis mak arguidu bolu lezada atu ba fó susu mak lezada laba hodi arguidu taa lezada.

Prokuradór husu ba tribunál atu presinde lezada nia deklarasaun, tanba lezada foin tinan ida ho balu no defeza laiha opozisaun. Nune'e tribunál bazeia ba pedidu ne'e presinde lezada ninia deklarasaun tanba arguidu ho lezada konfirma ona faktu sira hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada nain rua, bazeia ba konfisaun arguidu nian no konfirma mós husi lezada, tuir loloos arguidu mak tenke proteje sira husi kualker aktu oin-oin. Tanba ne'e, prokuradór laiha duvida ba faktu sira ne'ebé hakerek ona iha akuzasaun no husu ba tribunál atu kondena arguidu tuir artigu ne'ebé hakerek ona iha akuzasaun.

Entretantu defeza husu ba tribunál atu fó pena ne'ebé adekuaudu ba arguidu ho konsiderasaun katak arguidu depoisde akontesementu arguidu lahalai no arguidu rasik direktamente entrega aan ba polísia hodi koopera ho justisa signifika arguidu ho vontade atu koopera diak ho tribunál, oan na'in rua no arguidu mak iha responsabilidade ba nia família, foin primeiravés mai hatan iha tribunál. Tanba ne'e, defeza husu ba tribunál atu fó pena ne'ebé adekuaudu ba arguidu tuir nia sala.

Desizaun

Depoisde avalia faktu hotu tribunál prova katak arguidu taa dala rua iha lezada DE nia kanuruk, taa dala ida iha lezada DE nia liman fuan parte loos rezulta kotu, taa dala rua iha lezada DE nia liman sikun parte loos suku pontu sanolu resin ualu.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena prizaun tinan sanulu.

8. Krime ofensa ba integridade fízika simples ho natureza violénsia doméstika

Nú. Prosesu : 0092/22.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun fulan 9 suspende ba tinan 1

Iha 21 Novembru 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu HT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 10 Juñu 2022, maizumenus iha oras tuku 06:00 dadeer, arguidu basa dala rua iha lezada nia hasan parte karuk no basa dala iha lezada nia hasan parte loos rezulta lezada sofre moras, la too iha ne'e deit arguidu kontinua tuku dala rua iha lezada nia kotuk laran rezulta lezada sofre moras. Antes agresaun ne'e, arguidu ho lezada deskute malu kona-ba lezada deskonfia arguidu amante (*selingkuh*) ho feto seluk. Kazu ne'e aneksu hamutuk ho relatóriu médiku husi Pradet no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene halo agresaun fízika hanesan ne'e ladiak no provoca lezada sofre moras. Arguidu haktuir tan katak lezada mak ba apresenta keixa iha polísia no kontinua ba iha Uma-Mahon maibé la toba. Depoisde akontesementu arguidu sente hahalok hanesan ne'e ladiak, arrepende ona nia hahalok, diak malu ona, foin primeiravés mai hatan iha tribunál no promete sei larepete tan hahalok hanesan ne'e iha futuro, serbisu hanesan funsionariu iha PAX ho rendementu kada fulan US\$115.00 no iha oan na'in haat.

Prokuradór husu ba tribunál atu presinde lezada nia deklarasaun no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e no presinde lezada nia deklarasaun ho konsiderasaun katak arguidu rasik konfesa ona ba faktu hotu iha akuzasaun.

Alegasaun finál

Prokuradór iha nia alegasaun hateten katak hahalok arguidu provadu no preense duni elementu krime ofensa ba integridade fízika simples ho natureza violénsia deméstika. Prokuradór reforsa liu tan katak arguidu konfesa faktu hotu iha akuzasaun no laiha ema ruma mak haruka arguidu atu basa ka tuku ninia feen maibé arguidu rasik ho vontade atu halo agresaun fízika hasoru nia feen. Tanba ne'e, prokuradór husu ba tribunál atu kondena arguidu ho pena ne'ebé hakerek ona iha artigu 145 KP.

Enkuantu husi defeza alega katak iha produsaun ba prova, arguidu kolabora diak ho tribunál hodi konfesa faktu integralmente sem rezerva. Defeza salienta liután katak depoisde akontesementu arguidu sente hahalok hanesan ne'e ladiak no arrepende ona ba nia hahalok, foin primeiravés mai hatan iha tribunál, promete sei larepete hahalok ne'e iha futuro, serbisu hanesan funsionariu iha PAX ho rendementu kada fulan US\$115.00 no iha oan na'in haat. Tanba ne'e, defeza husu ba tribunál atu aplika pena ne'ebé adekua ba arguidu tuir nia sala.

Desizaun

Depoisde avalia ba faktu hotu tribunál prova katak arguidu basa dala rua iha lezada nia hasan parte karuk no basa dala iha lezada nia hasan parte loos rezulta lezada sofre moras, la too iha ne'e deit arguidu kontinua tuku dala rua iha lezada nia kotuk laran rezulta lezada sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok no promete sei la komte tan krime hanesan iha futuro, nune'e tribunál konklui prosesu ne'e no kondena arguidu ho pena prizaun fulan sia suspende ba tinan ida.

9. Krime ofensa ba integridade fízika simples

Nú. Prosesu : 0007/22.OEOSL
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Omologa pedidu dezisténsia keixa

Iha 21 Novembru 2022, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Herculano Co'i hasoru lezada Anastacia Sufa, iha Aldeia Nianapu, Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 13 Maiu 2022, iha oras tuku 19:53 lokraik, arguidu basa dala ida iha lezada nia hasan parte loos rezulta lezada sofre moras. Antes agresaun ne'e, arguidu ho lezada diskute malu kona-ba lezada ba konta ba ema seluk katak arguidu mak kuu hotu lezada nia modo iha toos laran, ho nune'e mosu agresaun hirak ne'e. Kazu ne'e aneksa hamutuk ho relatóriu médiku husi Sentru Saúde Oesilo no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezada.

Iha prosesu konsiliaun ne'e, lezada hakarak dame malu de'it ho arguidu sein kondisaun tanba sira dame malu ona no hela iha aldeia ida de'it, maibé lezada husu ba arguidu atu labele kontinua repete hikas hahalok hirak ne'e iha futuro. Alende ne'e arguidu mós konkorda ho pedidu lezada nian no deklara katak arrepende ona nia hahalok no promete

sei la repete tan hahalok hanesan iha futuru, nune'e lezada husu ba tribunál atu deziste tiha ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezada, nune'e tribunál konklui prosesu ne'e no omologa akordo dame entre parte sira.

10. Krime ofensa ba integridade fízika simples ho natureza violénsia doméstika

Nú. Prosesu : 0079/22.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 21 Novembru 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida NE hasoru nia laen, iha Distritu Oekusi.

Akuzasaun Prokuradór

Prokuradór akuza katak iha 17 Maiu 2022, maizumenus iha oras tuku 08:00 dadeer, arguida foti fatuk tuda lezadu no kona iha lezadu nia reen-toos rezulta kanek no raan. Antes agresaun ne'e, arguida ho lezadu diskuti malu kona-ba antes ne'e lezadu promete atu la kontinua hemu tua maibé iha kalan ne'e lezadu kontinua hemu tua-sabu, ho nune'e mosu agresaun ne'e. Kazu ne'e aneksu hamutuk ho relatório médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguida konfesa integralmente ba faktu hotu iha akuzasaun no hatene tuda lezadu ho fatuk bele halo lezadu hetan kanek no moras, depoisde akontesementu arguida sente hahalok hanesan ne'e ladiak no arrepende ona nia hahalok, diak malu ona, foin primeiravés mai hatan iha tribunál, promete sei larepete hahalok hanesan ne'e iha futuru, serbisu hanesan toos na'in no dona de casa laiha rendementu fiksi kada fulan no iha ona oan na'in ida.

Prokuradór husu ba tribunál atu presinde lezadu nia deklarasaun no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e no presinde lezadu nia deklarasaun ho konsiderasaun katak arguida konfesa faktu hotu iha akuzasaun.

Alegasaun finál

Prokuradór konsidera hahalok arguida nian ne'e provadu no bele halo lezadu mate tanba uza fali fatuk hodi tuda iha lezadu nia reen-toos. Prokuradór haktuir tan katak hahalok arguida nian prenze duni elementu husi krime ofensa ba integridade física simples ho natureza violénsia doméstika. Tanba ne'e, prokuradór husu ba tribunál atu kondena arguida ho pena ne'ebé hakerek ona iha artigu 145 KP.

Enkuantu husi parte defeza husu ba tribunál atu fó pena ne'ebé justu ba arguida tuir nia sala ho konsiderasaun katak durante iha produsaun ba prova arguida rasik konfesa faktu integralmente, depoisde akontesementu arguida sente hahalok hanesan ne'e ladiak no arrepende ona nia hahalok, diak malu ona, foin primeiravés mai hatan iha tribunál, promete sei larepete hahalok ne'e iha futuru, serbisu hanesan toos na'in no dona decasa laiha rendementu fiksi kada fulan no iha ona oan na'in ida. Tanba ne'e, defeza husu ba tribunál atu aplika pena ne'ebé justu ba arguida tuir nia sala.

Desizaun

Depoisde avalia ba faktu hotu tribunál prova katak arguida foti fatuk tuda lezadu no kona iha lezadu nia reen-toos rezulta kanek no raan.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguida konfesa, arrepende ona nia hahalok no promete sei la komete tan krime hanesan iha futuru. Nune'e tribunál konklui prosesu ne'e no kondena arguida ho pena prizaun tinan ida suspende ba tinan ida.

11. Krime maus-tratus ba kónjuje ho natureza violénsia doméstika

Nú. Prosesu	: 0111/21.OESIC
Kompozisaun Tribunál	: Kolektivu
Juis	: Dra. Florencia Freitas : Dr. Hugo da Cruz Pui : Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 2 suspende ba tinan 2

Iha 24 Novembru 2022, Tribunál Distritál Oekusi prezide julgamentu leitura akordaun ba krime maus-tratus ba kónjuje ho natureza violénsia doméstika ne'ebé envolve arguidu OMR hasoru nia eis feen, iha Distritu Oekusi.

Akuzasaun Prokuradór

Prokuradór akuza katak iha 19 Outubru 2021, iha oras tuku 07:30 dadeer, arguidu tebe ho maka'as iha lezada nia kelen parte karuk rezulta lezada monu kedas ba rai, arguidu kontinua tuku dala rua iha lezada nia oin parte karuk no tebe dala ida iha lezada nia liman parte karuk rezulta lezada sofre bubu no moras. Depoisde ne'e lezada tenta hamrik atu halai ses husi arguidu nia konduta ne'e, maibé arguidu kontinua duni tuir lezada hodi trata-aat tan lezada no tuku ho maka'as iha lezada nia oin lezada kontinua monu ba rai,

arguidu tebe tan lezada dala rua kona iha lezada nia kabun parte karuk no loos. Antes agresaun ne'e, arguidu ho lezada diskute malu kona-ba arguidu hakarak halo relasaun seksuál ho lezada, maibé lezada lakohi ho razaun tanba kolen ho serbisu uma laran nian no kalan tenke hader hodi haree sira nia oan, ho nune'e arguidu deskonfia lezada amante (*selingkuh*) ho mane seluk no mosu agresaun hirak ne'e.

Tuir mai iha 24 Novembru 2021, iha oras tuku 15:00 lokraik, arguidu tuku dala tolu iha lezada nia liman kabun rezulta lezada sofre moras, arguidu kontinua tuku lezada nia reen-toos parte karuk rezulta lezada monu ba rai kauza kanek kois iha lezada nia reen-toos. Bainhira lezada monu hela iha rai arguidu kontinua tebe dala ida iha lezada nia kotuk no tebe dala ida iha lezada nia kelen rezulta lezada sofre moras. Motivun husi akontesementu ne'e, arguidu deskonfia lezada amante (*selingkuh*) ho mane seluk. Kazu ne'e aneksu hamutuk ho relatóriu médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 8 konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak arrepende ona nia hahalok no promete sei la repete tan hahalok hanesan iha futuru. Arguidu mós deklarata katak seidauk diak malu ho lezada tanba depoisde akontesementu ne'e arguidu ho lezada moris separa ona. Arguidu deklarata liután katak antes ne'e mai ona iha tribunál no hetan ona kondensasaun tanba baku lezada, arguidu dezempregadu laiha rendimentu fiksi kada fulan, oan na'in haat dalaruma ba hela kalan ida rua ho lezada no dalaruma arguidu mak hela ho sira nia oan, arguidu sei mantein moris mesak seidauk iha feen kiik no kontinua tau matan ba sira nia oan.

Alende ne'e lezada kontinua komfirma faktu hotu iha akuzasaun no deklarata katak loos duni seidauk dame malu tanba hela keta-ketak too agora. Lezada deklarata mós katak mezmun nune'e lezada perdua ona arguidu no lakohi atu arguidu ba iha prizaun.

Prokuradór husu ba tribunál atu presinde testamuña sira seluk nia depoimentu tanba arguidu konfesa no parte defeza konkorda ho pedidu ne'e. Tanba ne'e, tribunál bazeia ba pedidu ne'e presinde testemuña sira nia depoimentu ho konsiderasaun iha produsaun ba prova arguidu rasik konfesa faktu integralmente.

Alegasaun finál

Prokuradór husu ba tribunál atu kondena arguidu ho pena prizaun tinan 2 suspende ba tinan 2 ho konsiderasaun katak hahalok arguidu provadu no preense duni elementu husi krime maus-tratus ba kónjuje ho natureza violénsia deméstika. Prokuradór konsidera hahalok arguidu kruel tebe-tebes tanba halo agresaun fízika hasoru nia feen iha lezada nia serbisu fatin no hakarak duni atu ema barak haree nia feen hodi hatun kredibilidade feton nia dignidade. Prokuradór haktuir tan katak kuandu laiha ona domin ba malu iha dalan atu bele husik malu tuir lei importante iha kbiit atu tau matan nafatin ba oan sira.

Enkuantu defeza konsidera aktu krime ne'e akontese tanba mosu provokasaun husi lezada ne'ebé rezeita pedidu arguidu nian atu halo relasaun seksuál hodi halo arguidu duvida ho lezada ninia domin ba arguidu. Defeza akresenta liután katak arguidu iha kolaborasaun diak ho tribunál, depoisde akontesementu too agora seidauk diak malu tanba hela keta-ketak, antes ne'e mai ona iha tribunál, dezempregadu laiha rendimentu fiksi kada fulan, oan na'in haat dalaruma ba hela kalan ida rua ho lezada no dalaruma hela ho arguidu, promete sei larepete hikas hahalok ne'e hasoru lezada ka ema seluk iha futuru no arguidu sei mantein moris mesak seidauk iha feen kiik hodi kontinua tau matan ba sira nia oan. Tanba ne'e, defeza husu ba tribunál atu aplika pena ne'ebé mais adekuadu tuir arguidu nia sala.

Desizaun

Depoisde avalia faktu hotu tribunál prova katak 19 Outubru 2021, iha oras tuku 07:30 dadeer arguidu tebe ho maka'as iha lezada nia kelen parte karuk rezulta lezada monu kedas ba rai, arguidu kontinua tuku dala rua iha lezada nia oin parte karuk no tebe dala ida iha lezada nia liman parte karuk rezulta lezada sofre bubu no moras. Depoisde ne'e lezada tenta hamrik atu halai ses husi arguidu nia konduta ne'e, maibé arguidu kontinua duni tuir lezada hodi trata-aat tan lezada no tuku ho maka'as iha lezada nia oin lezada kontinua monu ba rai, arguidu tebe tan lezada dala rua kona iha lezada nia kabun parte karuk no loos, tribunál mós prova katak iha 24 Novembru 2021, iha oras tuku 15:00 lokraik, arguidu tuku dala tolu iha lezada nia liman kabun rezulta lezada sofre moras, arguidu kontinua tuku lezada nia reen-toos parte karuk rezulta lezada monu ba rai kauza kanek kois iha lezada nia reen-toos. Bainhira lezada monu hela iha rai arguidu kontinua tebe dala ida iha lezada nia kotuk no tebe dala ida iha lezada nia kelen rezulta lezada sofre moras.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu konfesa, arrepende ona nia hahalok no promete sei la komete tan krime hanesan iha futuru. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan ida.

12. Krime kontrabandu

Nú. Prosesu	: 0004/22.PDOEC
Kompozisaun Tribunál	: Kolektivu
Juis	: Dra. Florencia Freitas : Dr. Hugo da Cruz Pui : Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 2 suspende ba tinan 2

Iha 24 Novembru 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Marcos Ulan hasoru Estadu RDTL, iha Aldeia Pasabe, Suku Abani, Sub-distritu Pasabe, Distritu Oekusi.

Akuzasaun Prokuradór

Prokuradór akuza katak iha 27 Agostu 2021, maizumenus iha tuku 08:00 dadeer, arguidu hatama gasolina litru 40 liuhusi fronteira entre Indonezia ho Timor-Leste Leste no la-selu taxa ba Estadu RDTL liuhusi direisaun Alfandega. Kazu ne'e aneksu hamutuk ho fotografia kona-ba aktu krime refere ne'ebé hasai husi polísia.

Prokuradór akuza arguidu kontra artigu 316 nú 1 KP kona-ba krime kontrabandu ho moldura penál tinan 2 to'o tinan 6.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun, arguidu mós deklarata katak loos duni arguidu sosa gasolina husi sidadaun Indonezia ida ne'ebé lori tama mai too iha arguidu nia toos hodi arguidu sosa. Arguidu deklarata liután katak arguidu sosa gasolina ne'e iha área Timor Leste nian no laos sosa iha Indonezia mak lori tama mai, arguidu deklarata katak depoisde akontesementu ne'e selu ona taxa ba estadu liuhusi kontabankaria prokuradór ho montante US\$40.00, arrepende ona nia hahalok, foin primeiravés hatama sasan hanesan mina husi dalan illegal, promete sei larepete hahalok ne'e iha futuru, serbisu hanesan toos na'in laiha rendimentu fiksi kada fulan, arguidu iha oan na'in rua no arguidu mak buka hahan hodi sustenta nesiedade família nian.

Prokuradór husu ba tribunál atu presinde testemuña nia depoimentu tanba arguidu konfesa no husi defeza laiha opozisaun. Tanba ne'e, tribunál bazeia ba pedidu ne'e no presinde testemuña husi UPF tanba iha produsaun ba prova arguidu rasik konfesa faktu hotu.

Alegasaun finál

Prokuradór konsidera arguidu provadu komete krime kontrabandu, bazeia ba konfisaun arguidu nian no krime sira kontrabandu mak rejista-aas iha prosesu kolektivu hotu iha juridiksaun Oekusi. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu kondena arguidu ho pena prizaun tinan 2 suspende ba tinan 2.

Enkuantu defeza konsidera hahalok arguidu la priense elementu krime kontrabandu tanba tuir deklarasaun arguidu katak iha momentu ne'e sosa gasolina ne'e husi sidadaun ida ne'ebé hatama mina iha liu territoriu Timor-Leste nian (toos arguidu nian) hafoin arguidu hola. Defeza dehan katak durante iha produsaun ba prova arguidu konfesa, kolabora diak, arrepende ona nia hahalok, arguidu foin primeiravés hatama sasan hanesan mina husi dalan illegal, promete sei larepete hahalok ne'e iha futuru, serbisu hanesan toos na'in laiha rendimentu fiksi kada fulan, arguidu iha oan na'in rua no arguidu mak buka hahan hodi sustenta nesiedade família nian. Tanba ne'e, defeza husu ba tribunál atu absolve arguidu husi aktu krime ne'e maibé karik tribunál iha hanoin seluk, parte defeza husu justisa.

Desizaun

Depoisde avalia ba faktu hotu no tribunál prova katak arguidu hatama gasolina litru 40 liuhusi fronteira entre Indonezia ho Timor-Leste Leste no la-selu taxa ba Estadu RDTL liuhusi direisaun Alfandega.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok no foin primeiravés hatama sasan liuhusi dalan illegal, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

13. Krime ofensa ba integridade física simples

Nú. Prosesu : 0005/22.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 29 Novembru 2022, Tribunál Distritál Oekusi prezide julgamentu leitura sentensa ba krime ofensa ba integridade física simples ne'ebé envolve arguidu Abelino Maria Lobato da Silva Amaral hasoru lezadu Jaime da Cruz, iha Aldeia Sanane, Suku Costa, Sub-distritu Pante-Makasar Distritu Oekusi.

Akuzasaun Prokuradór

Prokuradór akuza katak iha 02 Feveireiru 2022, maizumenus iha oras tuku 21:00 kalan, arguidu tuku dala tolu iha lezadu nia ulun rezulta moras no monu tun ba iha rai, bainhira lezadu monu hela iha rai arguidu kontinua tebe dala ida iha lezadu nia kelen parte loos rezulta lezadu sofre moras. Antes agresau ne'e, arguidu ho lezadu diskute malu kona-ba lezadu deskonfia arguidu utiliza rendimentu husi fatin futu manu nian ba nia nesesidade privadu no lafahe ho lezadu, maibé lezadu kontinua sisi bebeik, ho nune'e mosu agresau ne'e. Kazu ne'e aneksa hamutuk ho relatóriu médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal too tinan 3 ka multa.

Produsaun ba prova sira

Iha julgamentu, arguidu konfesa parsialmente ba faktu hotu iha akuzasaun katak arguidu tuku dala ida iha lezadu nia ulun laos dala tolu no lezadu lamonu iha rai. Arguidu deklaraliután katak kontinua tebe tan lezadu dala ida iha kelen no momentu tebe ne'e lezadu hamrik diak hela, depoisde akontesementu arguidu arrepende ona nia hahalok, seidak diak malu, serbisu hanesan negosiante ho rendimentu kada fulan lafiksu, oan na'in haat no promete sei larepete hikas hahalok ne'e iha futuru hasoru lezadu ka ema seluk no foin primeiravés mai hatan iha tribunál.

Enkuantu lezadu kontinua konfirma faktu hotu iha akuzasaun so iha de'it alterasaun ba nia deklarasaun kona-ba monu ne'e mak lalos tanba momentu ne'e arguidu tuku no tebe lezadu, lezadu ho pozisaun hamrik hela. Lezadu deklaraliután katak fatin futu manu ne'e kada semana ida iha jogu dala tolu iha laron Tersa, Sabado no Domingo no futu manu dala ida

selu US\$3.00, seidak diak malu tanba arguidu mak lakohi ba buka lezadu atu dame malu no kuandu arguidu ba buka lezadu, lezadu pronto perdua arguidu no dame malu.

Testemuña Antonio Nunes laiha relasaun família ho arguidu no lezadu depoimenta katak momentu ne'e haree duni arguidu tuku no tebe lezadu maibé lahatene kona-ba arguidu tuku lezadu dala hira. Testemuña deklara mós katak momentu ne'e arguidu lahatene tanba kuandu akontese hela no testemuña mak hafahe arguidu ho lezadu ate aktu violénsia ne'e para no fahe malu tiha.

Alegasaun finál

Prokuradór hanoin katak laiha duvida ba faktu hotu iha akuzasaun tanba iha produsaun ba prova arguidu konfirma faktu balun mesmu arguidu tenta atu desvia-an husi faktus balun. Tanba ne'e, prokuradór husu ba tribunál atu aplika pena prizaun fulan neen suspende ba tinan ida.

Entretantu defeza intende katak durante iha produsaun ba prova arguidu rasik kolabora, arrepende ona nia hahalok no foin primeiravés mai hatan iha tribunál. Defeza dehan katak arguidu tuku lezadu dala ida laos dala tolu no tebe dala ida iha kelen maibé momentu tebe ne'e, lezadu hamrik hela laos monu, arguidu arrepende ona ba nia hahalok, sedauk diak malu tanba lezadu mak lakoi dame, serbisu hanesan negosiante ho rendimentu kada fulan lafiksu, oan na'in haat no promete sei larepete hikas hahalok ne'e iha futuru hasoru lezadu ka ema seluk no foin primeiravés mai hatan iha tribunál. Tanba ne'e, defeza husu ba tribunál atu aplika pena ne'ebé justu ba arguidu.

Desizaun

Depoide avalia faktu hotu tribunál prova katak arguidu tuku dala tolu iha lezadu nia ulun rezulta moras no monu tun ba iha rai, bainhira lezadu monu hela iha rai arguidu kontinua tebe dala ida iha lezadu nia kelen parte loos rezulta lezadu sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu kolabora ho tribunál, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru, nune'e Tribunál konklui prosesu ne'e no kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl